



UKA16/44 & 138  
04. oktober 2016  
Múte Bourup Egede

**Nunarput tamakkerlugu kommunit suleqatigalugit angerlarsimaffeqanngitsunut angerlarsimaffiugallartussanik 100-nik sanaartornissaq qulakkeeriarlugu siunnersuummik aningaasaleeriaatsimik imaqartumik kingusinnerpaamik UKA 2017-imi Naalackersuisut saqqummiussinissaat pillugu Inatsisartuni aalajangiiffigisassatut siunnersuut.**

(Inatsisartunut ilaasortaq Mimi Karlsen, Inuit Ataqatigiit)

**Utoqqarnut sammititanik siunissami pisortat sanaartortarnissaannut aaqiissutissamik innersuussisumik Naalackersuisut kingusinnerpaamik UKA 2017-imi nassuiaammik saqqummiussinissaannik peqquneqarnissaannik Inatsisartuni aalajangiiffigisassatut siunnersuut.**

(Inatsisartunut ilaasortaq Ane Hansen, Inuit Ataqatigiit)

Inuit Ataqatigiit aaliangiiffissatut siunnersuutit soqutiginarlut marluk ataatsikkut oqaluuserisassagut imaattumik oqaaserqarfigissavagut.

Inuiaat kalaallit nunarsuup avannaarsuani issittumi, alianaatsorsuarmi aammali peqqarniissinnaasartumi nunassissimavugut.

Nunatsinni innuttaasut amerlanerpaartaat angerlarsimaffeqarpugut toqqissisimaffigisatsinnik ulluinnarnilu inuunitsinni pinngitsoorsinnaanngisatsinnik. Innuttaaqateqarpugulli ajoraluartumik angerlarsimaffimminnik annaasaqarsimasunik, ilaatigut inissaaleqineq ulluinnarnilu inuuniarnermi atukkatik pissutigalugit angerlarsimaffimminnik annaasaqarsimasunik.

Kommunerujussuannngortitsinerit kingorna innuttaaqatigut amerlasuut aamma angerlarsimaffeerunneq misigisimavaat. Oqaatigilluaannaraannimi kommunini tamani innunnik isumaginninnermi ajorseriaatit ilaat, tassalu inunnik isumaginninnermi pisortanik ikiorsiissutini aningaasanut tungasortaasa illoqarfimmi qitiusoqarfimmut nutserneqarsimanerat innuttaasunik pingaartumik illoqarfinni mikinerusuni nunaqarfinnilu najugalinnut equinerlussimavoq. Innuttaasummi piffissami aaliangersimasumi sulifferukkallartartut inuttullu ajornartorsiuteqarnertik pillugu ikiorsertariaqalersimasut tassani eqqugaanerluttarsimapput ikiorserneqarniarnerat qaammatit pingasut tikillugit suliarineqaruusaartarsimammat, ikiorsiinialernerlu pigaangat innuttaasut pineqartut angerlarsimaffiminniit anisitaareertarsimasarlutik. Inuit Ataqatigiit Naalackersuisut kaammattorusuppaat kommunerujussuannngortitsineri inunnik isumaginninnermi iluatsinngitsumik sulisimanerup ajornartorsiutigilersissimasai piaartumik misissoqqullugit iluarsineqarnissaat siunertaralugit.

Nunatsinni naatsorsueqqissaartarfiup kisitsisaatai malillugit angerlarsimaffeqanngitsut nunatsinni inuit 700-t missaaniipput. Tassa nunatta innuttaasa 1 procentiisa missaat angerlarsimaffeqanngitsuupput. Tamanna inuianguit 56.000-it sinnilaarlugit amerlatigaluta akuersaarsinnaanngilarput.

Kivitseqatigiinnitsigut nunaqqatigut pisariaqartitsisut ingerlariaqqinnissaannik aqutissitissallugit pisussaaffeqarpugut. Nunaqqatittami ikiortariallit ingerlariaqqinnissaannik sulineri Namminersorlutik Oqartussaagutta, kommuneugutta, suliniaqatigiiffiugutta, suliffeqarfiugutta innuttaasuuguttaluunniit tamatta akisussaaqatigiittariaqarpugut.

Inuit Ataqatigiit immikkoortoq 44-mut siunnersuuteqartoq Mimi Karlsen isumaqatigaarput

siunnersummi aallarniutaani oqarmat nunatsinni innuttaaqatitta ilaasa angerlarsimaffeqanngitsuunerat akuersaaruminaatsoq. Siunnersuutillu siunertaa tassalu nunatsinni innuttaasut tamarmik angerlarsimaffeqalernissaat tamakkiisumik taperserlutigu. Siunnersuuteqartorlu aamma isumaqatigaarput angerlarsimaffeqanngitsut angerlarsimaffigallagassaannik sanaartornissamik siunnersuummini kommuneni ataasiakkaani pisariaqartitsineq aallavigalugu Namminersorlutik Oqartussat kommunellu aningaasartuutitut avitseqatigiillutik sanaartortarnissaannik siunnersuuteqarmat.

Nuna najugarput inerisarniartigu tamatta toqqissisimalluta atugarissaarlutalu inuuneqalernissatsinnik siunnerfeqarluta. Taamatullu anguniagaqarluta siunnerfeqarnitsinni aallartiffissatsialaraarput nunatsinni innuttaasut tamarmik angerlarsimaffeqalernissaat.

Nunatsinni inissiarpassuit ullutsinnut naapertuukkunnaarsimasut tamanit ilisimaneqarpoq. Inissianillu nutarterinermi avaqqussinnaanngilarput inissiat utoqqarnut naapertuunnerusut amerlinissaat. Ukiukkummi silami tummeqqat quasattut, appussaasimasut inissiallu tikikkuminaatsut utoqqartatsinnut neqeroorutigissallugit tulluanngillat.

Piffissanngorpoq inissianik nutarterineq ilutigalugu utoqqartatsinnut naapertuunnerusunik sanaartorluta inissialiortalernissarput pilersaarusiussallugu. Utoqqartattami sapinngisamik sivisunerpaamik namminneq toqqissisimaffigisaminni angerlarsimaffiminniiginnartarnissaat anguniartariaqarparput.

Ukiuni kingullerni oqallinnerni tusartuarparput aammalumi kisitsisit takutittarpaat ukiuni tulluuttuni qaninnerni nunatsinni utoqqartatta amerliartuaarnissaat.

Inuit Ataqtigiit siunnersuuteqartoq Ane Hansen isumaqatigaat siunnersuummini siunissami utoqqaat amerliartornerat ilutigalugu inissiat utoqqarnut naapertuunnerusut sanaartorneqarnissaannik pilersaarusiortoqarnissaanik siunnersuuteqarmat.

Inuit Ataqtigiit utoqqartatsinnut inissialiornissani pilersaarusiornermi takorloorsinnaavaat, inissiat utoqqartatta namminigisaminnik ineqaraluarlutik utoqqaleqatiminnik sanileqarlutik ataatsimoorfigisinnaasaannik peqassasut, soorlu silami igaasaqatigiiffigisinnaasaminnik, sila qanoq ikkaluarpalluunniit aneerasaaqatigiiffigisinnaasaminnik il.il. Naatsumik oqaatigalugu inuiattut pingaartitagut naleqartitagullu aallaavigalugit utoqqartagut inissialiuuttalertariaqarigut.

Taamak oqaaseqarluta aaliangiiffissanik siunnersuuteqartut, Inuit Ataqtigiit Inatsisartunut ilaasortaataat Mimi Karlsen aamma Ane Hansen inuiaqatigiinni pisarialinnik qaqitsimmata qutsavigaagut siunnersuutaallu tamakkiisumik taperserlutigit.